

摘藻堂四庫全書薈要

史部

欽定四庫全書薈要卷八千八百二十

明史紀事本末卷八

浙江提學僉事谷應泰編

北伐中原

元順帝至正十九年九月明太祖遣千戶王時往方國珍所附海舟至元都偵察元政及察罕特穆爾李思齊軍馬情形時察罕克汴梁平山西秦隴等處遂分兵鎮守關陝荆襄河洛而重兵屯太行日練兵積穀謀恢復

山東軍聲大振故遣時往探之

二十一年八月復遣都事汪河使元通好察罕特穆爾時察罕用兵山東招降東平田豐樂安俞寶等其勢頗盛上謂左右曰察罕特穆爾雖假義師圖恢復乃與博羅特穆爾兵爭不解屢格君命此豈忠臣所為乎又聞其好名如田豐傾側亦復恃以腹心則昧于知人矣吾今遣人往與通好觀其行事然後議焉

二十二年春正月元平章庫庫特穆爾遣使來通好庫

庫察罕甥王保保也察罕養為己子先是察罕駐汴梁太祖嘗遣使通好既而察罕亦以書來聘太祖以前所遣使不還不之答察罕尋為叛將田豐王士誠所刺博羅代領父衆乃遣尹煥章送我使者自海道還太祖復遣都事汪河與俱往報禮河至河南庫庫留之拘于陝州踰三年始得還以為吏部侍郎

二十六年夏四月壬戌元徐州守將樞密同知陸聚聞徐達等已克淮安以徐宿二州詣達軍降太祖嘉其識

天命命為江淮行省叅政仍守徐州于是邳蕭宿遷睢寧諸縣皆降。秋九月上遣書送元宗室神保大王及黑漢等九人于元主。

吳元年元至正二十七年也春正月遣使以書諭元庫庫特穆爾先是使臣汪河為庫庫所拘留太祖以書諭之不報至是復與之書畧曰予自起義以來拓地江左閣下之先以興復為名提兵河北古人朝聘往來不過將道誠意今汪河去而不返是所拘者少所失者大也。

閣下地非不遠兵非不多所慮者張思誠操刃于潼關
李思齊抗衡于秦隴俞寶畜變于肘腋王信生釁于近
郊閣下自以功成安如泰山坐使羣雄連結禍機一發
首尾莫救此深為閣下惜所以數使遣人奉書瀆聽者
是予欲盡一得之愚于閣下閣下何為自矜倘能遣使
刻日將命以汪河錢禎等還豈惟不失前盟亦可取信
天下如其不然我則命襄陽之師經唐鄧之郊北趨嵩
汝以安陸沔陽之兵掠德安向信息使安豐濠泗之將

自陳汝擣汴梁徐邳之軍取濟寧淮安之衆約王信海道舟師會俞寶同入山東此時閣下之境必至土崩瓦解是又開我南國之兵端為彼後日之戰禍閣下其審思之毋貽後悔 命傅友德守徐州二月丁未元庫庫特穆爾遣驍將左丞李貳來寇兵駐陵子村友德堅壁俟其出掠乃將步騎三千餘溯舟至呂梁捨舟督陸擊之李貳遣裨將韓乙盛兵迎戰友德躍馬奮槊刺韓乙墜馬敗去友德度李貳必益兵來鬪趨還城開門出兵陣

于城外令士卒皆卧鎗以待聞鼓聲即起擊有頃李貳果率眾至友德令鳴鼓我師奮起衝其前鋒李貳眾大潰溺死無算遂生擒貳獲其將士二百餘人馬五百匹擢友德江淮行省叅知政事 十月甲子太祖命將北

取中原謂信國公徐達等曰自元失其政生民塗炭予與諸公仗義而起冀有奠安生民者出豈意大難不解為眾所附遂平陳友諒滅張士誠闡廣之地將以次而定尚念中原擾攘山東則有王宣父子反側不常河南

則有王保保上疑下叛關隴則有李思齊張思道彼此猜忌與王保保互相嫌隙元之將亡其機在此今欲命諸公北伐計將何如遇春對曰今南方已定兵力有餘直擣元都以我百戰之師敵彼久逸之卒可挺竿而勝也都城旣克乘勝長驅餘皆建瓴而下矣太祖曰元建都百年城守必固若如卿言懸師深入頓于堅城之下餽餉不繼援兵四集非我利也吾欲先取山東撤其屏蔽旋師河南斷其羽翼拔潼關而守之據其戶檻天下

形勢入我掌握然後進兵元都則彼勢孤援絕不戰可克既克其都鼓行而西雲中九原以及關隴可席卷而下諸將皆曰善太祖因顧達曰兵法廟算勝者得算多也于是命徐達為征北大將軍常遇春為征北副將軍率甲士二十五萬由淮入河長驅北伐復召諸將諭之曰征伐所以奉天命平禍亂故命將出師必在得人今諸將非不健鬪然能持重有紀律戰勝攻取得為將之體者無如大將軍達當百萬之衆勇敢先登摧鋒陷陣

所向披靡無如副將軍遇春然吾不患遇春不能戰但患其輕敵耳吾前在武昌親見遇春纔遇數騎挑戰卽輕身赴之彼陳氏如張定邊者何足稱數尚據城指揮遇春為大將顧與小校爭能甚非所望切宜戒之若遇大敵遇春領前鋒當與參將馮宗異分左右翼各將精銳擊之右丞薛顯叅政傅友德勇畧冠諸軍可使獨當一面或有孤城小敵但遣一將有膽畧者付以總制之權皆可成功達則專主中軍策厲羣帥運籌決勝不可

輕動古云將在軍君不御者勝汝等其識之又謂傅友
德曰此行汝當努力昔漢高祖與項羽爭衡彭越宣力
于山東今用師自山東始汝其勉之是日太祖親祭上
下神祇于北門之七里山祝畢復召將士諭之曰此行
非必畧地攻城要在削平禍亂以安生民凡遇敵則戰
若所經之處及城下之日勿妄殺人勿奪民財勿毀民
居勿廢農具勿殺耕牛勿掠人子女或有遺棄孤幼在
營父母親戚來求者卽還之丙寅馳檄諭齊魯河洛燕

薊秦晉之人檄曰自宋祚傾移元主中國此豈人力實
乃天授自是以後元之臣子不遵祖訓廢壞綱常有如
大德廢長立幼泰定以臣弑君天歷以弟鳩兄至于弟
收兄妻子烝父妾上下相習恬不為怪夫君人者斯民
之主朝廷者天下之本禮義者御世之防其所為如彼
豈可為訓于天下及其後嗣荒淫失道加以宰相擅權
憲臺報怨有司毒虐于是人心離叛天下兵起使我中
國之民死者肝腦塗地生者骨肉不保雖因人事所致

實天厭其德而棄之也當此之時天運循環億兆之中
當降生聖人立綱陳紀救濟斯民今一紀于茲未聞有
濟世安民者徒使爾等戰戰兢兢處于朝秦暮楚之地
誠可矜憫方今河洛關陝雖有數雄阻兵據險互相吞
噬皆非人民之主也予本淮右布衣因天下亂為衆所
推率師渡江居金陵形勢之地得長江天塹之險今十
有三年西抵巴蜀東連滄海南控閩越湖湘漢沔兩淮
徐邳皆入版圖奄及南方盡為我有民稍安食稍足兵

稍精控弦執矢目視我中原之民久無所主深用疚心

予恭承天命罔敢自安方欲遣兵北伐拯生民于塗炭

復漢官之威儀慮民人未知反為我讐挈家北走陷溺

尤深故先諭告兵至民人勿避予號令嚴肅無秋毫之

犯爾民其體之十一月壬子克沂州初揚州興化人

王宣元末為司農掾治河有功命為招討使從伊蘇復

徐州授義兵都元帥宣子信從察罕特穆爾破田豐復

令宣與信還鎮沂州至是達師至淮安以書諭宣父子

使降信得書遣使納款太祖遣徐唐臣等至沂州授信
江淮平章政事令以兵從大將軍征討宣父子陰持兩
端乃令信密往莒密募兵而遣人詐犒師以緩我軍達
受而遣之使還宣卽以兵夜劫徐唐臣欲殺之衆亂唐
臣脫身走達軍達卽日率師抵沂州分兵急攻之都督
馮宗異令軍士開壩放水宣自度不能支開門降達令
宣為書遣鎮撫孫惟德招降信信不從殺孫鎮撫走山
西于是嶧州趙蠻子莒州周黼海州馬驪及沐陽日照

贛榆諸縣并隨信將士皆來降達以宣反覆執而戮之
命韓溫守沂州太祖遣使諭達曰聞將軍已下沂州如
向益都當遣精銳扼黃河要衝斷其援兵可以必克若
益都未下卽宜進取濟寧濟南二城旣下益都山東勢
窮力竭如囊中物矣達命平章韓政畧榆行梁城諸鎮
寨繼又令政分兵扼黃河以斷山東援兵政遣千戶趙
實畧滕州元守將楊知院遁去達進攻益都路宣慰使
布延布哈捍城力戰不能支城陷還與母訣曰兒不能

兩全忠孝矣。達聞其賢，遣使召之，不往。被執，不屈。與總管胡濬、知院張俊俱死之。布哈妻阿魯章亦抱其子女投井死。執其平章婁博囉與白知縣等，獲士馬兵糧以萬計。十二月丁未，都督同知汪興祖師至東平。元平章馬德棄城走，興祖遣指揮常守道千戶許秉進至東阿。元叅政陳瑊以所部五萬餘人降，秉復以舟師趨安山鎮。元右丞杜天佑、左丞蔣興皆降。徐達至濟南，元平章和琳、台詹同托音、特穆爾先驅，人民引軍遁。平章達多

爾濟津巴等以城降得將士三千八百五十五人馬四

百二十九匹命指揮陳勝守之庚戌汪興祖至濟寧元

守將陳秉直棄城遁甲子徐達遣叅政傅友德取萊陽

丙辰上復遣使諭達遇春曰聞大軍下山東所過郡縣

元之省院官降者甚多二將軍皆留于軍中吾慮其雜

處或晝遇敵或夜遇盜將變生不測非我之利益此輩

初絀于勢力未必盡得其心不如遣之使來處我官屬

之間日相親近然後用之方可無患若濟寧東平諸來

歸將士家屬亦發遣來將厚待之

太祖洪武元年二月癸卯詔湯和還明州造海舟漕運
北征軍餉都督同知康茂才率師往濟南從大將軍達
北征 癸丑常遇春克東昌元平章申榮自經死在平
等縣皆降 丙寅徐達平樂安初樂安俞勝納欵達禮
而遣之勝歸復叛達進攻之師至土河距樂安五里命
軍士填壩以進郎中張仲毅出降勝遁去達命指揮華
雲龍守之 戊子命中書省給榜撫安山東郡縣時山

東悉平令所在訪賢才凡仕元者疑懼不自安故榜諭

之 丙申上別命征南將軍鄧愈帥襄陽安陸景陵等

處兵北畧地愈遣別將王成李廷琛攻唐州克之進取

南陽路擒其將史國新 徐達引兵上黃河克永城歸

德許州師至陳橋己亥左君弼珠徽以汴梁降先是君

弼自唐州走安豐安豐復走汴梁元汴梁守將李克彝

使守陳州上遣使諭以書曰曩者兵連禍結非一人之

失予勞師暑月與足下從事足下乃舍其親而奔異國

是皆輕信羣下之言以至于此今足下奉異國之命與予接壤若欲興師侵境其中輕重自可量也且予之國乃足下父母之國合肥乃足下丘壠之鄉天下兵興豪傑並起豈惟乘時以就功名亦欲保全父母妻子于亂世足下以身為質而求安于人既已失策復使垂白之母糟糠之妻天各一方以日為歲足下縱不以妻子為念何忍忘情于老母哉功名富貴可以再圖生身之親不可復得足下能留意于是幡然而來予當棄前非仍

復待以故君弼得書猶豫不能決上乃歸其母于陳州

君弼感泣至是大兵下山東西指汴洛克彝夜驅軍民遁入河南君弼與珠徽等率所部兵詣達降達命都督僉事陳德守汴梁率步騎自中灣進取河南彗星出

昂北夏四月徐達率大軍自虎牢關進至河南塔兒灣元將托音特穆爾以兵五萬迎戰列陣于洛水之北我軍旣成列常遇春單騎執弓矢衝入其陣敵發二十騎攢槊刺遇春遇春發一矢斃其前鋒大呼殺入達指

揮乘之俘斬無算托音特穆爾將散卒走陝州達遂進

營于河南城北門李克彝復走陝西元河南行省平章

梁王阿魯威送款軍門戊申河南平達命左丞趙庸守

之士子副將軍常遇春率兵至嵩州守將李知院迎降

甲寅入其城分兵下未附諸山寨戊子元鞏縣孟夏寨

叅政李成降庚申元福昌知院張興鈞州守將哈喇婁

許州右丞謝李陳州知院楊崇各遣人詣大將軍降辛

酉叅政傅友德分兵取福昌山寨元右丞潘瑪勒降副

將軍常遇春下汝州留兵守之遂徇下邳縣 壬戌都

督同知馮宗異克陝州元守將托音特穆爾復棄城遁
以都督同知康茂才守之大軍克裕州執元守將平章
郭雲雲勇敢有謀畧時河南諸郡皆下獨雲守裕州累
戰不克招之不從後以孤軍敗被執上嘉其忠義釋而
用之 詔免山東夏稅秋糧中原兵難之後流離失業
者多遣使賑恤 甲子車駕發京師幸汴梁時言者謂
君天下宜居中土汴梁宋故都勸帝往視之且會大將

軍謀取元都 五月庚午大將軍徐達遣指揮王臻帥
兵往虢州取毛葫蘆山寨甲申登封鞏縣雞翎山并天
堂山寨復叛徐達遣指揮豐諒率兵討平之指揮任亮
克露豹王山等寨叅政傅友德取凌青黑山二寨 庚
寅車駕至汴梁辛卯常遇春馮宗異至行在謁見徐達
尋自河南至上皆慰勞之達等頓首謝既退上復召問
達取元都計達對曰臣自平齊魯下河洛王保保逡巡
太原觀望不進今潼關又為我有張良弼李思齊失勢

西竄元之聲援已絕臣等乘勢薄其孤城必克無疑上

據圖指示曰卿言固是然北土平曠利騎戰不可無備
宜選裨將提兵為先鋒將軍督水陸之師繼其後下山
東之粟以給饋餉由秦趨趙轉臨清而北直擣元都彼
外援不及內自驚潰可不戰而下達受命退 丁酉以

江西行省左丞何文輝守河南任亮守嵩州都督同知
康茂才兵至河北安邑夏縣皆降 七月鄧愈進兵克

隨州元守將右丞王誠降壬午新寨瑪展等叛愈遣指

揮吳復討平之 時潼關以東悉平上命諸將還師進
取元都上將發汴梁大將軍徐達等自陳橋入辭諭之
曰朕與公等率衆渡江誓除禍亂以安天下士卒舍父
母妻子戰鬪于矢石之間百死一生久未休息朕每念
之惕然于中非得已也今中原之民久為羣雄所苦死
亡流離徧于道路天監在茲朕不敢忘故命爾等帥師
北征拯民水火昔元祖入主中國子孫怠荒罔恤民艱
天厭棄之君則有罪民復何辜前代革命之際兵戈相

加視如仇讐朕實不忍爾諸將帥克城之日毋擄掠毋
焚蕩毋妄殺人必使市不易肆民安其生凡元之宗戚
皆善待之庶幾上答天心下慰人望以成朕伐罪救民
之志有不恭命必罰無赦丙申車駕發汴梁還京師以
副將軍馮宗異留守徐達遂檄都督同知張興祖平章
韓政都督副使孫興祖指揮高顯等將益都濟寧徐州
之師會于東昌元大都紅霧及黑風起閏七月徐達等
分布士馬規取河北遂自中灣渡河庚子右丞薛顯叅

政傳友德兵至衛輝元守將平章龍二棄城走彰德辛
丑徐達等師至淇門鎮傅友德獲嘉縣尹胡仲信達命
從鎮撫王處仁守衛輝癸卯師至彰德龍二復出走陳
同知等詣軍門降達令左丞楊思祖守之明日龍二部
將楊義卿以船八十艘來歸遂下磁州進攻廣平元平
章周昱棄城遁邯鄲尹都文玉率父老降克趙州獲元
將侯僉院等己酉進次臨清遣人詣東昌趣都督同知
張興祖以師來會又檄守樂安指揮華雲龍將兵從征

庚戌傅友德游騎獲元將李寶臣都事張處仁以為鄉

道達因遣友德開道通步騎都督副使顧時浚閘通舟

師時諸將駐臨清久知府方克勤籌應芻糧無匱乏朱

亮祖勒民夫五千濬河克勤不忍勞民泣禱于天天大

雨水漲舟遂行 癸丑平章韓政都督副使孫興祖俱

以師會臨清于是大將軍徐達率馬步舟師北發命韓

政守東昌并鎮撫臨清達師至德州常遇春張興祖及

指揮高顯毛讓程華等皆會戊午達等師至長蘆元守

將左僉院遁去達命指揮費子賢守之分兵徇下清州
師至直沽獲其海舟七艘造浮橋濟師常遇春張興祖
各率舟師並河東西以進步騎遵陸而前元丞相伊蘇
等捍禦海口望風奔潰元都大震 癸亥大將軍徐達
等師至河西務大敗元平章俺普達多爾濟津巴擒其
知院海拉蘇等三百餘人達進兵至通州營于河東岸
常遇春營于河西岸衆欲速攻之指揮郭英曰吾師遠
來敵以逸待勞攻城非我利也宜出其不意攻之翼日

大霧英以千人伏道旁率精騎三千直抵城下元將五

十八國公率敢死士萬餘張兩翼而出戰良久英佯敗

敵乘勝來追伏兵起截其軍為二斬首數千級擒其將

巴延特穆爾 丙寅達率諸將入通州是月二十七日

也元主聞報大懼集后妃太子議避兵北行遲明召羣

臣會議端明殿時元都再遭博羅庫庫之變民生喪亂

守備多不設元主徘徊嘆息曰今日豈可復作徽欽遂

決計北徙左丞相實勒們知樞密院事哈斯等皆勸固

守京城不聽命淮王特穆爾布哈監國丞相強通留守
是夜三鼓元主及后妃太子開建德門由居庸北走如
上都 八月二日庚午徐達等進師取元都至齊化門
將士填濠登城而入達登齊化門樓執其監門宗室淮
王特穆爾布哈及太尉中書左丞相強通平章德呼默
色保賽音布哈右丞相張康伯御史中丞穆徹等戮之并
獲宣府鎮南威順諸王子六人及玉印二成宗玉璽一
封府庫圖籍寶物及故宮殿門以兵守之宮人妃主令

其宦寺護視號令士卒無侵暴人民安堵達下令凡元朝大小諸臣皆令送告身于官署民籍中違者有罰元翰林待制黃殷仕欲投井為其僕所守乃紿僕曰吾甚愧何從得酒醉而出見可也其僕喜入市取酒殷仕遂投井死左丞丁敬可總管郭允中皆死之學士危素寓僧寺亦欲赴井一僧止之曰公死亡國史也遂往見達明日順德守將吉右丞胡叅政鄭叅政皆自西山來降武德衛軍校獲前樂安逃將俞勝及南叅政張郎中等

達遣將赴京獻捷仍命薛顯傅友德曹良臣顧時等將
兵偵邏古北諸隘口 甲戌徐達遣人詣東昌令韓政
分兵守廣平徐達遣指揮華雲龍經理故元都新築城垣
張興祖徇永平路下之 癸未詔大將軍徐達改飛熊

衛為大興左衛淮安衛為大興右衛樂安衛為燕山左衛
濟寧衛為燕山右衛青州衛為永清左衛徐州五所為
永清右衛留兵三萬人分隸六衛命都督副使孫興祖
僉事華雲龍守北平大將軍徐達副將軍常遇春等率

大軍往取山西

二年二月庚辰元丞相伊蘇侵通州時城中守兵僅千人也速萬騎營于白河守將曹良臣謂其部下曰吾兵少不可與戰彼衆雖多然亡國之後屢挫之兵可以計破也乃密遣指揮許勇等于沿河舟中各樹赤幟亘三十餘里鈺鼓之聲相聞伊蘇望之驚遁大將軍達承制遣揚璟等還征唐州先是鄧愈下唐州以宋指揮守之尋唐州兵亂賊將老馬劉及南陽郡縣皆相應事聞

故有是命璟至南陽攻唐州一鼓破之戮其首惡南陽

復平 六月元伊蘇復侵通州上命常遇春以所部軍

自鳳翔還禦之復命李文忠為偏將軍副遇春自北平

往開平道三河經鹿兒嶺過會州敗元將汪文清于錦

州得士馬以千數次全寧伊蘇復以兵迎戰又敗之伊

蘇遁進攻大興州文忠策其必走乃分兵千餘為八屯

伏其歸路伊蘇果夜遁遇伏大敗走擒其丞相托和齊

遂帥兵道新開嶺進攻開平元主先已北走追奔數百

里俘其宗王慶生平章鼎珠等斬之凡得將士萬人車

萬輛馬三萬匹牛五萬頭薊北悉平改元都為北平府

谷應泰曰高帝起淮右布衣定鼎金陵削平吳漢

奄有荆楚開拓閩越固已志清中原之民氣吞大

河之北矣吳元年遂命徐達常遇春大舉六師奉

辭伐罪乃不鼓我朝銳直搗幽燕而先取山東撤

其屏蔽轉戰河南斷其羽翼再取潼關據其戶檻

然後彈丸孤城所向必克猶之酈生說漢首下陳

留光武滅新先收宛雒蓋論事者動言高皇之英
武而不知平生之謹慎也至若虓虎之臣貔貅之
佐莫不汗馬功高風雲氣壯以故塔兒灣之捷河
西務之捷通州開平之捷比之垓下合圍悲歌四
起昆陽大戰屋瓦皆飛固宜開國承家勒銘鐘鼎
者矣然夷考其時大軍戡定者猶少先聲歸命者
更多於凡青徐各郡千里扶攜兗豫諸司百城分
潰東阿荏平小邑也而降濟南汴梁巖城也而亦

降馬德陳秉漢人也而遁和琳托音元種也而亦
遁蓋以其時乾綱廢弛羣情竄散柄臣尾大旣誅
帝后東宮腦滿擅討儉邪以至開河起大業之愁
鼓檝有海山之戲又且列圖素女拱手望夷日肆
恣淫坐視瓦裂太祖之興豈非天之所啟乎況乎
馮牙北出伐亂救民屢詔軍中勿妄誅戮破都之
日市不易肆彼以暴吾以仁彼以昏吾以義克紂
都而去殷弊政入咸陽而除秦苛法從知天命之

有歸乃在人心之豫附矣若乃會議端明棄同甌
脫叔寶全無心肝紀侯大去其國審德量力吾何
責焉獨是伯顏入宋妃后皆俘明室破元嬪媵不
御忠厚開基又何必天道之好還也



明史紀事本末卷八



總校官庶吉士臣張能照

校對官編修臣閔惇大

謄錄舉人臣嚴儀

欽定四庫全書叢要

史部

明史紀事本末卷十九

詳校官員外郎臣楊世綸



欽定四庫全書薈要卷八千八百二十一

明史紀事本末卷九

浙江提學僉事谷應泰編

畧定秦晉

太祖洪武元年元將李思齊張良弼聞王師下河南即

駐兵潼關以拒既而火焚良弼營思齊仍移軍退守葫蘆灘遣其部將張德欽穆薛飛守關五月都督同知馮宗異抵潼關思齊棄輜重走鳳翔良弼奔麟城丙寅宗

異遂入潼關引兵西至華州元守將望風奔潰先是宗
異下陝州上遣使諭之曰若克潼關勿遽乘勝而西令
大將軍方有事北方宜選將守關以遏其援兵爾且率
師回汴梁至是五月庚午徐達調僉事郭興將慶陽衛
指揮于光威武衛指揮金興旺守之丙子宗異回軍至
陝州與徐達俱還河南 八月大將軍徐達副將軍常
遇春既定元都受命帥師取山西副將軍馮宗異偏將
軍湯和平章楊璟俱從大將軍徐達征討 九月乙丑

副將軍常遇春等下保定留指揮李傑守之丁卯下中山以指揮董勳守之遂帥師趨真定元守將孫平章棄城走 十月戊辰大將軍徐達遣廣武衛鎮撫劉聚守河間兼領府事副將軍馮宗異偏將軍湯和由河南渡河克武陟下懷慶元平章白索珠棄城遁兵至太行山碗子城破其關元兵奔潰進取澤州元平章賀宗哲棄城遁破磨盤寨獲叅政俞仁戮之進克潞州分兵克雄州以鎮撫程信守之 十一月癸丑徐達克趙州以叅隨

王成守之右丞薛顯敗元托克托特穆爾于石州庫庫特
穆爾遣其將哈扎爾來攻澤州楊璟張彬往援之遇元
兵于韓店大戰失利 十二月大將軍徐達率諸軍進
取太原庫庫特穆爾敗走庫庫特穆爾者察罕特穆爾
甥也先是察罕與羅山人李思齊起兵擊賊元授察罕
汝寧達魯噶齊察罕死詔庫庫領父兵封河南王而李
思齊亦在節制中思齊自謂父行與他將張良弼孔興
圖魯卜等皆欲異軍思齊遂據盩厔良弼據麻臺庫庫

遣關保珪琳齊攻麻臺李思齊孔興圖嚙卜皆與良弼
合元數趨庫庫出師庫庫遣其弟托音特穆爾及部將旺扎勒
摩該往山東而自與思齊良弼相攻一歲餘元下詔與和斛
庫庫殺詔使拒命遣兵據太原元太子與關保思齊良
弼諸軍合夾攻澤復削奪庫庫爵邑令思齊等誅之庫
庫退守平陽關保據澤潞二州與摩該合戰而明兵已
及河南思齊良弼乃自詣庫庫與結好因解兵西歸庫
庫與摩該關保戰擒之上疏陳罪元赦庫庫特穆爾復

其官使出兵禦明命右丞伊蘇趨山東圖魯出潼關李
思齊出七盤金商圖復汴梁然大將軍已至遁入北平
順帝夜開建德門北走仍命庫庫率兵出雁門關由保安
州經居庸關以攻北平達聞之謂諸將曰王保保率師
遠出太原必虛北平孫都督總六衛之師足以鎮禦我
與汝等乘其不備直抵太原傾其巢穴彼進不得戰退
無所依此兵法所謂批吭擣虛也若彼還軍救太原則
已為我牽制進退失利必成擒矣遂引兵徑進庫庫既

至保安州聞之果還軍前鋒萬騎突至傅友德薛顯率
敢死士數十騎衝却之庫庫軍于城西壓明軍而陣指
揮郭英憑高望之謂常遇春曰彼兵多而不整營大而
無備請夜劫之遇春然其計與徐達謀曰我騎兵雖集
而步兵未至何以能戰莫若遣精騎夜劫其營其衆可
亂衆亂主將可縛也會庫庫部將呼必瑪勒潛遣人約降
且請為內應達大喜遂乘夜襲之先遣五十騎伏城東
十里以舉火鳴砲為期至夜郭英率十餘騎潛入其營

舉火鳴砲伏兵應之遇春等兵大至鼓噪相接軍大潰
自相蹂躪庫庫方燃燭坐帳中使兩童子執書侍倉卒
不知所出亟納靴未竟蹠一足踰帳後出得驪馬從十
八騎遁去達等勒兵進營城西呼必瑪勒以其將校降得
兵四萬人馬四萬餘疋庫庫奔大同遇春率兵追至忻
州不及得行人汪河還庫庫走甘肅 庚午徐達遣傅
友德薛顯將步騎邀擊賀宗哲于石州敗之以戴復初
署霍州丁玉明署忻州蔣應宗署崞州翁子奇守大石

副將軍馮宗異西至猗氏擒元右丞賈成甲戌進攻平陽擒元右丞李茂下之叅政陸聚率兵攻車子寨及鳳山成山帖山三寨降之復取故關山寨承天寨宗異進攻絳州克之擒元右丞田保徐伯昌獲將士五百人陽曲盤關勒等十寨頭目各以其衆詣大將軍徐達營降

二年春正月詔免北平燕南山東山西河東河南潼關唐鄧光息等處稅糧 甲寅副將軍常遇春帥師攻大同庚申兵至大同元守將珠展棄城走擒知院于陳等同

八十餘人 叅政傅友德將兵屯朔州右丞薛顯攻下

潞州桃花寨大將軍徐達遣叅政陸聚分兵守井陘故
關聚進攻承天寨克之 癸亥遣使賫勅徃山西諭諸

將曰近者大夫湯和定浙左平閩中平章楊璟靖湖湘
定廣西班師還朝未有定賞以大將軍等滅元未還故
也于是遣諸偏將從大將軍征進楊璟兵出澤潞中道
與賊相拒雖少算以累軍此亦兵家常事且太原得此
為犄綴以分其勢今定左副將軍馮宗異居遇春之下

偏將軍湯和居宗異之下偏將軍楊璟居和之下協力
同心剪除餘寇 二月大將軍徐達師次河中副將軍
常遇春馮宗異先渡河趨陝西 三月乙未元郟城守
將副樞施成詣軍門降徐達仍令成守之庚子徐達師
至鹿臺遂入奉元路先是李思齊據鳳翔副將欽穆薛
飛等守關中張思道與孔興圖嚙卜金牌張龍濟民李
景春等駐鹿臺以衛奉元至是大兵入關思道等先三
日由野口遁去達遣都督僉事郭興將輕騎擣奉元而

自率大軍繼進渡涇渭至三陵坡父老千餘迎降達按
兵遣左丞周凱入城撫諭明日整兵入改奉元路為西
安府以夏德署府事留耿炳文守之炳文在長安脩築
涇陽洪渠諸堰十萬一千餘丈民便利之大軍西征供
億繁急炳文輸餉五千石赴鞏昌軍食賴以足達師之
至鹿臺也元陝西行省平章哈瑪爾圖棄奉元走藍屋為
民兵所殺平章烏爾圖西臺治書侍御史王武遁去復降
斬之西臺御史僧格實哩守關家洞達遣攻之勢窮促

不屈與妻子俱投崖死左丞貝沁古逃入終南山郎中
王可仰藥死檢校實克布哈自縊死三原尹朱春與其
妻亦俱投崖死時關中饑上聞命戶賜米一石繼又命
赴孟津倉戶給米二石民大悅 癸卯常遇春馮宗異
等帥師發陝西進克鳳翔初李思齊之奔鳳翔也上以
書諭之曰前者遣使通問至今未還豈所使非人忤足
下而留之與抑元使適至不能隱而殺之若然亦時勢
之常大丈夫當磊磊落落豈以小嫌介意哉夫堅甲利兵

深溝高壘必欲竭力抗我軍不知竟欲何為昔足下在秦中兵衆地險雖有張思道專尚詐力孔興等自為保守庫庫以兵出沒其間然皆非勅敵足下此時不能圖秦自王已失此機今中原全為我有向與足下相為犄角者皆披靡竄伏足下以孤軍相持徒傷物命終無所益厚德者豈為是哉朕知足下鳳翔不守則必深入沙漠以圖後舉然非我族類其心必異倘中原相從之衆以塞地荒涼一旦變生肘腋妻孥不能相保矣且足下

本汝南之英祖宗墳墓所在深思遠慮獨不及此乎誠能以信相許翻然來歸當以漢竇融之禮相報否則非朕所知也思齊得書有降意其麾下誘之與西入吐蕃思齊惑之至是大兵至鳳翔思齊懼遂帥所部奔臨洮

叅政傅友德克鳳州以指揮張能守之 夏四月丙寅

大將軍徐達會諸將于鳳翔議所向諸將咸以張思道之才不如李思齊慶陽易于臨洮欲先由幽州取慶陽然後從隴西攻臨洮達曰不然思道城險而兵悍未易

猝拔臨洮之地西通番戎北界河湟取之其人足以備
戰鬪其土地所產足以供軍儲今以大軍蹙之思齊不
西走胡則束手就縛矣臨洮既克則旁郡自下諸將然
之達乃留御史大夫湯和守營壘輜重令指揮金興旺
余思明等守鳳翔遂移師趨隴州克之尋至秦州馬跑
泉元守將呂德張義遁去遣都督僉事陳德追獲之以
合肥衛千戶王宏將兵五百守隴州張規魯將兵千人
守秦州達進師至鞏昌元守將梁子中汪靈真保等出

降以都督僉事郭興守之遣馮宗異攻臨洮顧時戴德
攻蘭州丁丑顧時等克蘭州以指揮韓溫守之馮宗異
師至臨洮李思齊窮迫舉城降宗異遣人送徐達營達
遣指揮韋正等守之臨洮捷奏至上覽畢即遣使諭徐
達曰李思齊既降宜進攻慶陽寧夏張思道兄弟多詐
若來降當審處之勿墮其計也李思齊入見命為江西
行省左丞不之官食祿于京師 己卯徐達師入安定
州以降將陳宗聚署州事調青州右衛官軍守之克會

州以叅隨黎宗文署州事指揮陳壽守之乙酉徐達師

入靖寧州遂徇下隆德縣五月丁酉大將軍徐達師

至蕭關下平涼指揮朱明克延安以明守之辛丑元

將張良臣以慶陽降初張思道在慶陽聞王師克臨洮

懼走寧夏而使其弟張良臣平章姚暉守慶陽思道至

寧夏與金牌張等俱為庫庫特穆爾所執徐達既下平

涼即謀取慶陽令湯和遣兵往涇州別遣指揮張煥將

騎兵偵邏慶陽遣人招良臣良臣以其兄被執遂以城

降良臣驍勇善戰軍中呼為小平章戊申良臣復據慶陽叛初良臣之降也遣其花叅政詣徐達獻軍民數日尋又遣知院李克仁葛八來獻馬數達遣右丞薛顯將騎兵五千人同克仁等赴慶陽比良臣出迎匍伏道左佯為卑下以示歸順薄暮即以兵劫營顯等不意其叛為所衝潰指揮張煥被執顯被傷走還達聞語諸將曰帝明見萬里外今日之事果如前言然良臣之叛祇取滅亡耳當與諸公戮力剪之于是馮宗異傅友德聞良

臣叛帥師自臨洮至涇州湯和亦帥所部來會達恐其

黨相扇為聲援乃先遣兵抄其出入俞通源將精騎畧

其西顧時畧其北傅友德畧其東陳德畧其南達帥諸

將趨慶陽以兵四面圍其城良臣出兵挑戰達麾兵擊

敗之六月辛巳達督諸軍攻慶陽張良臣遣珠克徃寧

夏求援于王保保獲斬之仍以叅隨王敬祖將兵守彭

原 秋七月甲午徐達遣降將李茂等將騎兵千人往

隆德秦安等處收捕未附頭目杜拜布哈羅左丞相等

辛亥王保保部將哈札爾陷原州指揮陳壽死之徐達

聞報與馮宗異傳友德議以驛馬關當其衝遣右丞徐

禮將兵據之又遣指揮葉石真守彭原調指揮韋正守

邠州傳友德薛顯駐靈州扼之宗異復與徐達謀曰今

大軍圍慶陽張良臣雖困未能遽下王保保欲為良臣

聲援故令扎爾攻原州欲以救慶陽請得移軍逼關以

扼原州彼無所施矣達然之宗異遂以其軍西臨驛馬

關去慶陽三十里而軍是夜扎爾復攻陷涇州丁千戶

退保靈臺縣宗異自驛馬關引兵赴之扎爾走追至邠州又走宜祿遁去宗異還屯驛馬關 八月丙寅慶陽

小元帥謀納款為張良臣所囚城中降者夜劫小元帥出詣大將軍營達受之令軍中無虐降者 先是七月

己亥常遇春還次柳河川得疾卒上令偏將軍李文忠代領其衆至是詔文忠自北平會師攻慶陽行至太原會元將圖魯卜等攻大同甚急文忠謂左丞趙庸等曰吾與公等受命而來閩外之事有利于國專之可也今

大同被攻甚急若候進止豈不失機衆皆諾遂由代出
鴈門至馬邑適游騎數千奄至猝遇我師與戰敗之擒
其平章劉特穆爾進至白楊門又擒黠寇四大王時天
雨雪文忠疑有伏乃身引數騎入山察視之前軍已駐
營去敵五十里文忠至遽令遷之復前至五里營於漫
地阻水先遣由間道達大同使知之元將圖魯卜悉銳
來攻文忠令將士秣馬蓐食閉營不出先以兩營誘敵
督令死戰自寅至辰前營報數至文忠不為動良久度

其饑疲乃分軍為左右翼身當前鋒奮擊大敗之生擒
圖嚕伯降其衆萬餘獲馬疋輜重甚衆縛圖嚕卜詰軍
門文忠解其縛與之共食遂進兵東勝州至莽果倉而
還先是元主北走騰格哩命圖嚕卜孔興以重兵攻大
同欲圖恢復至是圖嚕卜被擒孔興走綏德其部將復
斬之來降元主知事不濟無復南向矣圖嚕卜至京師
上曰彼各為其主耳釋之賜冠帶衣服 癸未徐達克
慶陽先是徐達率諸將四面圍其城張良臣出戰東門

顧時擊敗之復自西門出戰馮宗異禦之走還良臣登
城呼呂德約降達不聽初良臣之叛也自以其城險而
下有井泉可據以守其兵精悍養子七人皆善戰軍中
語曰不怕金牌張惟怕七條鎗又其兄思道與王保保
為聲援賀宗哲哈扎爾為羽翼姚暉葛行為爪牙故欲
拒守以圖大功及明師列營城下困之良臣不得逞數
出戰俱不利遣人赴寧夏求援輒被獲內外音問不通
糧餉乏絕至煮人汁和泥噉之姚暉熊左丞胡知院知

事不濟開門納降達勒兵自北門入良臣父子俱投井
中引出斬之明日誅良臣黨柴知院等二百餘人以都
督僉事陳德守之先是賀宗哲攻鳳翔或隧地或突至
甕城凡十五日指揮金興旺周興嬰城固守至是慶陽
下宗哲乃引去徐達聞宗哲由六盤山遁遣顧時薛顯
傅友德將萬騎追之宗哲以其衆掠蘭州達遣馮宗異
率步騎一萬七千道靖寧擊之宗哲由德呼蘇渡河遁
去宗異乃率所部還 九月大將軍徐達御史大夫湯

和發平涼還京師以右副將軍馮宗異總制軍事 十

二月王巴拜知大將軍南還自甘肅以兵襲蘭州奄至
城下守將指揮張溫會諸將校曰彼悉衆襲我我兵寡
難與為敵然彼遠來未知我衆寡乘暮擊之可挫其鋒
彼不退則固守以待援于是整兵出戰巴拜兵少却溫
斂兵入城巴拜進圍之溫堅守不與戰鷹揚衛指揮于
光守鞏昌將兵來援至蘭州之馬蘭灘卒遇巴拜兵戰
敗被執至蘭州城下使呼張將軍出降光大呼曰我不

幸被執公等但堅守徐總兵將大軍至矣敵怒批其頰
遂遇害城中聞光言守益堅夜二鼓保保以兵登城千
戶郭佑醉不能起巡卒擊却之溫屢設方畧乘怠破其
兵已拜圍數月不利且聞大軍至遂引去溫執郭佑數
其罪將殺之知事朱有聞諫曰當其時斬佑以徇所謂
軍法從事也今賊已退誅之無及徒有專殺罪溫杖而
釋之事聞陞溫都督僉事贈恤于光

谷應泰曰初太祖之北伐也直趨青濟者正兵而

西扼潼關者疑兵也故以徐中山大軍搃彼胸腹
而以馮宗異孤軍綴彼聲援原未嘗命其仰關而
攻躍馬而入也此時元將之守晉者為庫庫特穆爾
其守秦者為李思齊張思道皆庸才耳庫庫之應
詔入援出雁門經居庸其算神矣而太原根本空
國而去一軍奄至巢覆穴傾此晉之所以亡也李
思齊負百二之險藉建瓴之勢乃不捲甲出關以
斷河南要路而反徘徊關內風鶴驚奔使宗異拱

手而取河西安驅而入華陽此秦之所以亡也假
令庫庫留守如孟德之保三城思齊出關如趙奢
之爭閼與則明之重兵深入雲代既壓其前韓魏
又議其後托權未去伊蘇重來安危之機正未可
必也奈何徐常諸將由豫入晉自晉達秦庫庫不
戰于北平而戰于晉陽思齊不戰于河津而戰于
峭底譬之腐鼠孤雛直坐受人縛耳然又不特此
也思齊以父行倔强庫庫以私釁稱兵大敵在前

而兩虎自鬪遂使明兵直入河南迅掃上谷方始
解甲西歸輸誠結好憂卞莊之刺講廉藺之歡嗚
呼晚矣以予觀之唐起冀方混一區宇秦據雍州
蠶食六國而元末武臣坐失事機怯于公戰正所
謂倔强莽莽之間遷延歲月之命豈真仗義勤王
有深圖遠算之概哉至于哈扎爾之河隍剽掠張
良臣之慶陽復叛而明師乃能西臨驛馬東叩大
同出奇無窮料敵制勝則晉室之表裏山河秦地

之隩區陸海安得不為新主資也

明史紀事本末卷九

欽定四庫全書薈要卷八千八百二十二

明史紀事本末卷十

浙江提學僉事谷應泰編

故元遺兵

太祖洪武三年春正月癸巳上以王保保為西北邊患
命右丞相信國公徐達為征北大將軍浙江行省平章
李文忠為左副將軍都督馮勝為右副將軍御史大夫
鄧愈為左副將軍湯和為右副將軍往征沙漠上問諸

將曰元主遲留塞外王巴拜近以孤軍犯我蘭州其志

欲僥倖尺寸之利不滅不已卿等出師當何先諸將皆

曰巴拜之寇邊者以元主之猶在也若以師直取元主

則巴拜失勢可不戰而降上曰王巴拜方以兵臨邊今

舍彼而取元主是忘近而趨遠失緩急之宜非計之善

吾意欲分兵二道一令大將軍自潼關出西安搃定西

以取王巴拜一令左副將軍出居庸入沙漠以追元主

使彼此自救不暇應援元主遠居沙漠不意吾師之至

如狐豚之遇猛虎取之必矣事有一舉而兩得者此是也諸將皆曰善遂受命而行 二月北平守禦華雲龍克雲州獲元平章呼魯固公右丞噶海等大同指揮金朝興克東勝州獲元平章荆麟等大同都督同知汪興祖克武州朔州獲元知院馬廣等 夏四月大將軍徐達率師出安定初達師至定西王巴拜退屯車道峴達遣左副將軍鄧愈立柵逼之至是出安定駐沈兒峪口與王巴拜隔深溝而壘一日數戰王巴拜發兵千餘人

出間道從東山下潛刦東南壘一軍皆驚左丞胡德濟
倉卒不知所出達率親兵擊之斬東南壘趙指揮及將
校數人以徇軍中股栗明日整衆出戰諸軍爭奮遂大
敗保保兵於川北亂塚間擒元郊王文濟王及國公闊
思孝平章哈扎爾珪琳齊嚴奉先李景昌察罕布哈等
官一千八百六十五人將校士卒八萬四千五百餘人
獲馬萬五千二百八十餘匹駱駝驢騾雜畜稱是保保僅
與其妻子數人從古城北遁去至黃河得流木以渡遂

由寧夏奔和林都督郭英追至寧夏不及而還巴拜至

和林元嗣主阿裕爾實哩達喇復任以事徐達以胡德濟

失律械送京師上念其舊勞特赦之仍遣使諭達曰將

軍欲效衛青不斬蘇建獨不見穰苴之待莊賈乎胡左

丞失律正當就軍中戮之今歸之朝廷朝廷必議其功過

彼常守信州救諸全皆有功不忍即加誅懼將軍緣此緩

其軍法是用遣使即軍中諭意五月丁酉左副將軍

李文忠左丞趙庸師出野狐嶺擒元平章祝真進敗元

太尉曼濟平章沙布迪音多爾濟巴勒等於白海之駱駝

山遂次開平元平章尚都罕等降 都督孫興祖率燕

山右衛指揮平定大興左衛指揮龐禋兵次賽音布拉克川

遇元兵力戰皆沒於五郎口海寧衛指揮副使孫虎率

兵至落馬河及元太尉瑪魯戰死之 癸卯李文忠克

應昌文忠率師趨應昌未至百餘里獲元騎問之知四

月二十八日庚申君已殂文忠督兵兼程而進遇元兵

一戰敗之追至應昌圍其城獲元主孫密迪理巴喇并

后妃宮人諸王省院達官士卒等宋代玉璽金寶一十五宣和殿玉圖書一玉冊二鎮國玉帶玉斧各一及駝馬牛羊無算惟太子阿裕爾實哩達刺與數十騎遁去文忠率精騎追之至北慶州不及而還道興州降其兵民三萬七千人至紅羅山又降其兵民萬六千餘人捷聞至京師百官稱賀上命禮部榜示凡經仕元者不與又以庚申君不戰而奔克知天命謚曰順帝上又自為祭文曰生死廢興非一時之偶然乃天地之定數古之聖

賢於是四者一或臨之不為之變何也蓋知天命而不惑者也君之祖宗昔起沙漠彎弓矢入據大都橫行天下九彙八蠻盡皆歸之非天命不至此及君之父子正當垂衣守成之時而盜生汝穎華夏騷然號令不行以致失國此人事歟天道歟朕於其時非有三軍六師以威天下乃代君家而為民主亦莫非天命也曩者君主沙漠朕主中國君與羣臣乃固執不移致邊警數興今聞君沒於沙漠朕用惻然特遣人致弔奠以牲醴以享

爾靈爾其鑒之 六月李文忠遣人送俘獲元諸王密
迪哩巴拉等及其寶冊至京師省臣楊憲等請以密迪
哩巴拉獻俘於廟寶冊令百官具朝服進上曰寶冊貯
之庫不必進也古者雖有獻俘之禮武王伐殷曾用之
乎憲對曰武王事殆不可知唐太宗嘗行之上曰太宗
是待王世充若遇隋之子孫恐不行此禮元人入主中
國百年之內生齒甚繁家給人足朕之祖先亦預享其
太平雖古有獻俘之禮不忍加之只令服本俗衣以朝

朝畢賜以中國衣冠就令謝恩復謂憲曰故國之妃朝於君者元有此禮不必效之亦令衣本俗衣於中宮朝見見畢賜中國之服亦令謝恩乙亥密廸哩巴拉朝見奉天殿其母及妃朝見坤寧宮俱賜以中國服及賜第宅於龍山封密廸哩巴拉為崇禮侯丁丑頒平定沙漠詔於天下仍遣使賫詔諭安南高麗占城是日百官表賀上諭之曰當元之季君則晏安臣則跋扈國用不經征斂日促天怒人怨盜賊蜂起天下已非元有矣朕取

天下於羣雄非取天下於元氏向使元君克畏天命不自暇逸其臣各盡乃職罔敢驕奢天下豪傑其得乘隙而起耶遣使詔諭元宗室部落臣民 元宗室四大王初遁入靜樂竒嵐山中結寨自固至是率衆寇武州太原指揮程桂等擊敗之追至龍尾莊四大王遁走獲其三大王托和爾特穆爾送京師 乙酉左副將軍鄧愈招諭吐番元陝西行省吐番宣慰使索諾木藏布詣軍門降鎮西武諸王伯訥呼亦以吐番諸部來降追元豫王

至西黃河抵黑松林殺額森圖罕於是河州以西甘朶
烏思藏等部皆來歸征哨極甘肅西北數千里始還九
月命指揮韋正守河州正初至河州城邑空虛人骨山
積將士見之咸欲棄去正語之曰正受命率公等出鎮
邊陲當不避艱險報國恩今既至此無故棄去一旦遂
生戎心其誰禦之吾與若等死亡無地妻孥不得相保
毋寧死於王事乎於是衆感激如命正日夜撫循軍民
河州遂為樂土 冬十一月壬辰大將軍徐達左副將

軍李文忠等還至龍江車駕出勞於江上

四年春正月命魏國公徐達往北平訓練軍士繕治城

池給守邊將士衣 二月甲戌元遼陽守將平章劉益

降先是遣斷事黃儔詔諭遼陽諸處官民帥衆歸附益

遂以遼東州郡地圖并籍兵馬錢糧之數遣右丞董遵

僉院楊賢奉表來降詔置遼東衛指揮使司以益為指

揮同知未幾元平章洪巴拜馬彥翬共謀殺益張良佐

房嵩復擒彥翬殺之巴拜走納克楚營遼東之衆因推

良佐曷權衛事至是良佐以聞并遣使貢馬上元所授
印章宣勅金牌獻賊殺劉益逆黨仍上其事於中書省
曰本衛地方遼遠僻處海隅肘腋之間皆為敵境元平
章高家努固守遼陽山寨知院哈喇章屯駐瀋陽古城
開元則有丞相伊蘇之兵金山則有太尉納克楚之衆
彼此相依互為聲援今洪巴拜逃往其營必有搆兵之
釁乞留斷事吳立鎮撫軍民先將逆黨巴勒丹知院實勒
械送京師詔以良佐曷為遼東衛指揮僉事魏國公

徐達徙北平山後之民三萬五千八百戶散處衛府籍
為軍者給衣糧籍為民者給田以耕凡已降而內徙者
三萬四千五十六戶尋命達自北平往山西操練士馬

秋七月遼東衛奏元納克楚據金山為邊患遣黃儔
賫書諭之曰比者元綱解紐紅巾起於汝穎羣盜徧於
中原僭名號者繼出小明王稱帝於亳徐真一稱帝於
蘄陳友諒稱帝於九江張士誠稱王於姑蘇明玉珍稱
帝於西蜀擁兵數萬割據中原垂二十年朕本淮民為

羣雄所逼集衆渡江與將軍會於太平比待他俘特加
禮遇且知將軍為名家特釋北歸今又十七年矣朕見
羣雄無成遣兵四出北平中原南定閩粵東取方氏西
收巴蜀四帝一王皆為俘馘元君奔亡華夏悉定此天
命非人力也近聞將軍居金山大張威令吾兵亦守遼
左與將軍旌旗相望將軍若能遣使通問貢獻姑容就
彼順其水草自守一方不然大厦將傾非一木可支釁
之後先惟將軍自思之儔至金山納克楚拘留不還

置遼東都指揮使司以馬雲葉旺為都指揮使吳泉馮祥為同知王德為僉事總轄遼東諸衛軍馬上以劉益之變納克楚未附特命雲等鎮之雲等由登萊渡海駐兵金州招降元叅政葉廷秀攻走平章高嘉努遂進至遼東完城繕兵一方遂安命靖海侯吳禎帥舟師運餉遼東淮安侯華雲龍統兵至雲州謀知元平章僧嘉努營於牙頭夜遣精兵襲之突入其營擒僧嘉努盡俘其衆獲駝馬四百餘匹進至上都大石岸攻破劉學士

寨擊敗魯爾國公於高州武平悉衆北奔又遣指揮孫
恭等帥兵口北招諭惠王巴圖布哈儲王巴延布哈宗
王子瑪爾布特穆爾等冬十二月丙戌遣人送巴圖布哈
等至京上命賜第宅襲衣什器等物仍月給錢米有差
五年春正月乙丑詔賜魏國公徐達曹國公李文忠宋
國公馮勝交趾弓五十彤弓百庚午命達為征北大將
軍出中路文忠為左副將軍出東路勝為右副將軍出
西路三道並進以清沙漠中路由鴈門趨和林東路由

居庸出應昌西路由金蘭趨甘肅 三月徐達抵山西
境都督藍玉為前鋒敗巴拜游騎於野馬川丁卯復敗
巴拜於圖刺河巴拜遁與賀宗哲合而拒我師於嶺北
時師數發砲而心輕敵驟與之戰不利死者萬餘人達
固壘而救之故徹侯功臣無死者巴拜亦不敢入塞偏
將軍湯和遇別部於斷頭山亦敗 馮勝師次蘭州傅
友德率驍騎五千為前鋒直趨西涼遇元沙實罕兵擊敗
之追至永昌又敗元太尉多爾濟巴勒於和勒歡口大獲

其輜重牛馬進至掃林山勝等師亦至共擊元兵走之
友德手射死其平章布哈追斬四百餘人降太尉索諾
木嘉勒平章袞楚克夏六月戊寅元將尚律先知大軍至
率所部吏民八百三十餘戶迎降勝撫輯其民留兵守
之進至額齊納路守將巴延特穆爾全城降師至別駕
山元岐王多爾濟巴勒遁追獲其平章昌嘉努等二十
七人及馬駝牛羊十餘萬友德復引兵至瓜沙州又敗
其兵獲金銀印馬駝牛羊二萬而還 李文忠率都督

何文輝等兵至口溫敵聞之夜棄營遁獲其牛馬輜重
無算遂進至哈喇莽賚敵部落驚潰復進至臚朐河文
忠下令曰兵貴神速千里襲人難以負重乃留輜重臚
朐河令部將韓政等守之士卒人持二十日糧兼程而
進至圖拉河元太師哈喇章漫濟悉衆渡河留其妻子
北嚮而嚴騎以待文忠督兵力戰戰數合敵稍却復進
至鄂勒琿河敵兵益衆搏戰不已文忠馬中流矢急下
馬持短兵接戰從者劉義直前奮擊以身蔽文忠指揮

李榮見事急以所乘馬授文忠自奪敵騎乘之文忠得馬氣益厲據鞍橫槊麾衆更進於是士卒鼓勇皆殊死戰敵敗走逐北至騁海敵兵益大集文忠乃勒兵據險自固而多張疑兵縱所獲馬畜於野示以閒暇居三日敵疑有伏不敢逼稍稍引去文忠亦解而歸迷失道至僧格拉木乏水渴死者甚衆文忠患之忽所乘馬跑地長鳴泉水湧出土馬賴以俱濟是役也顧時與文忠分道入沙漠糧且盡遇元兵士卒疲乏不能戰時奮勇獨

引麾下數百人躍馬大呼擊敗之掠其輜重牛馬還軍復大振曹良臣至鄂勒琿河孤軍深入敗沒驍騎衛指

揮使周顯振武指揮同知常榮神策衛指揮使張耀俱死焉秋七月乙未文忠以所獲故元官屬子孫及軍士家屬一千八百四十餘人送至京師 九月丁巳吳禎

遣送遼東元平章高嘉努知樞密院高大方同僉高世舉張海馬遼陽路總管高賦等至京師 冬十一月壬

申命賞甘肅京衛軍士時馮勝等以匿所獲馬騾牛羊

不賞上曰祭遵為將憂國奉公曹彬平江南所載惟圖

書汝等當法古人省躬以補過諸將叩頭謝 十二月

壬寅遣使賫書與元幼主又與元臣劉仲德朱彥德書

曰人臣致身於君貴有終始至正之君蒙塵而崩幼主

初立朝之大臣無不叛去獨二生竭力事之誠可嘉尚

今特遣使者諭君數事且令取其子密迪哩巴拉歸二

生宜察之母教人以倔强絕父子之道爾君宗祀不絕

二生家族亦可長保如其不然六軍出討旌旗蔽塞於

陰山二生身膏草野固竒男子事也或不能徇國偷生
免死何面目與朕相見惟熟慮之

六年春正月壬子命魏國公徐達曹國公李文忠徃山
西北平練兵防邊 夏四月華雲龍奏上諸關防守事

宜東自永平薊州密雲西至五灰嶺外隘口通一百二
十一處相去約二千二百里其王平口至官坐嶺關隘
有九約去五百餘里俱衝要之地並宜設兵守之紫荆
關及蘆花山嶺尤為要路宜設千戶所禦守從之 六

月甲申武朔等州邊警時大將軍徐達駐師臨清報至遣臨江侯陳德鞏昌侯郭興將兵擊之 秋八月丙子

河州土門峽邊警千戶王才戰死 陳德郭興兵至達

蘭哈濟口遇敵騎擊敗之生擒其同僉興都等斬首六百級獲駝馬牛羊千頭餘衆潰去 冬十月涼州屢有

邊患都指揮宋晟率兵討之追至額齊納之地斬其渠帥伊約蘓索爾等衆又招降其國公吳巴圖等 十一

月壬子徐達等擊元兵於懷柔三角村擒其平章康同

僉李文忠出朔州擒元太尉巴延布哈

七年春正月曹國公李文忠敗敵於白登俘其國公博
囉特穆爾文忠駐代縣遣將各出擒平章陳安禮瑪蘇
繙於賽音布拉克斬珍珠律於順寧陽門 二月癸亥

臨江侯陳德獲韃靼圖魯默色等九十七人於會寧諸
處六安侯王志獲韃靼一百餘人於朔州諸處俱送京
師三月丁卯勅大將軍徐達分布六安侯王志南雄侯
趙庸駐山西營陽侯楊璟汝南侯梅思祖駐北平屯種

達與李文忠馮勝還京師 乙亥蘭州巴特瑪民郭木

德叛誘番兵入寇詔立賞格購捕之蘭州衛遣其兄珠

實卜與其弟和斯岱往招之郭木德不從扎實和斯台夜

斬其首以歸事聞上曰木德罪固當死然為兄弟者告

之不從執之而已手自刃之有乖大倫若賞之非所以

令天下也但以所獲牛馬給之 夏四月己亥都督僉

事藍玉率兵攻興和元將托音特穆爾棄城走 丙辰

命宋國公馮勝衛國公鄧愈中山侯湯和鞏昌侯郭興

復鎮北邊戊午都督僉事金朝興等獲元太尉盧巴延
布哈平章特穆爾布哈等於黑城子等處河南都指揮
使繆道獲元叅政等官於昇拉山等處而還 秋七月

曹國公李文忠督兵攻大寧高州火石崖克之斬元宗
王托多錫勒擒承旨伯嘉努八月丙辰追擊之於豐州
擒其帥十二人部衆百餘人馬駝牛羊萬計魯王敗走
追斬之獲其妃蒙克及其印并斬其司徒塔斯哈平章
巴圖知院忽都等 九月丁丑遣崇禮侯密迪哩巴拉

北還上謂廷臣曰崇禮侯密迪哩巴拉南來五載能無
父母鄉土之情於是厚禮而歸之選老成宦者二人送
行復遺其父阿裕爾實哩達喇織文金綺錦衣各一襲辭
行上諭之曰爾本元君子孫國亡就俘曩即欲遣歸以
爾年幼道里遼遠恐不能達今既長成朕不忍令爾久
客於此故特遣歸見爾父母以全骨肉之恩又諭二宦
者曰此爾君之嗣也不幸至此長途跋涉爾善視之因
遺書諭元主阿裕爾實哩達喇

八年夏五月詔永嘉侯朱亮祖同潁川侯傅友德率師
往北平備邊 八月故元王巴拜卒巴拜自定西之敗
走和林元嗣主復任以政後從徙金山之北至是卒於
合刺諾海之衙庭其妻毛氏亦自縊死上一日宴謂群
臣曰天下誰為男子者皆對曰無如常國公所將不過
萬人而橫行無留陣上乃拊髀歎曰是遇春耶我得而
臣之我竟無以臣王巴拜真男子也竟冊其妹為秦王
妃 冬十二月癸巳元太尉納克楚寇遼東守將馬雲

葉旺擊敗之先是上勅遼東都司曰今天寒冰結敵必乘時入寇宜堅壁清野以待之慎勿與戰使其進無可得退有後慮伏兵險阻扼其歸路可坐而致也至是果入寇都指揮使馬雲等探知納克楚將至命蓋州衛指揮吳立張良佐等嚴兵城守敵至堅壁勿戰及納克楚至見城中備禦嚴不敢攻乃越蓋州城徑趨金州時金州城垣未完軍士寡少指揮韋富王勝等聞寇至督勵士卒分守諸城門選精銳登城以禦之納克楚裨將鼐喇

固自恃其驍勇率數百騎徑至城下挑戰城上發弩射之
擊納克楚不利慮援兵且至引兵退走以蓋州有備不
敢經其城乃由城南十里外沿祚河道歸都指揮葉旺
策其將退先引兵趨祚河自連雲島至窟駝塞十餘里
緣河疊冰為牆以水淋之經宿皆凝沍隱然如城藏釘
板於沙中設陷馬窵於平地伏兵以待之命老弱卷旗
登兩山間戒以聞砲即豎旗馬雲於城中亦立大旗令

定遼前衛指揮周鶚及吳立等各嚴兵以候四顧寂若
無人已而敵騎至旺等俟其過城南砲發伏兵四起兩
山旌旗蔽空鼓聲雷動矢石雨下納克楚倉皇北奔趨
連雲島遇冰城馬不能前皆陷入窰中遂大潰雲於城
中亦出兵追擊至將軍山必里克河斬戮及凍死者甚衆
旺等復乘勝追至猪兒峪獲其士馬無算納克楚僅以
身免

九年春正月擢馬雲葉旺都督僉事 命中山侯湯和

潁川侯傅友德帥師往延安防邊諭曰自古重邊防邊安則中國無事而四裔可以坐制今延安地控西北元騎聚散不常若待其入寇而後防之則塞上之民必將受害卿等至邊上當嚴為之備雖不見敵常若臨敵三月湯和等至延安元巴延特穆爾遣人請和上聞之召諸將悉還獨留傅友德屯邊以備之勅諭友德曰無事而請降兵法所戒爾其慎之四月巴延特穆爾果乘閒犯邊傅友德設伏大敗之俘其衆獲馬畜輜重無筭元

平章烏納岱遂執巴延特穆爾以降 十一月吐番所部川藏邀阻烏思藏使者掠其輜重命衛國公鄧愈為征西將軍都督沐英為副將軍率兵討之

十年夏四月鄧愈沐英等至西番分兵為三道併力齊入番部川藏覆其巢穴窮追至崑崙山斬首無算俘男女一萬獲馬五千牛羊十三萬 十一月都督濮貞征高麗被執不屈死之已而高麗龍川鄭白等來降勅遼東守將潘敬葉旺勿納以破其奸

十一年春正月北平警 五月元嗣君阿裕爾實哩達喇
殂子特古斯特穆爾立 秋八月西番洮州等處戎寇
亂命西平侯沐英為征西將軍率都督藍玉等統兵征
之首取甘朶降其萬戶且達爾嘉平其部落俘獲無算洮
州十八族番鬼據納琳七站之地英進兵擊之

十二年春二月戊戌命曹國公李文忠往河州岷州臨
洮諸處督理軍務 西平侯沐英兵至洮州番寇三副
使阿卜薩等率衆遁去我軍追擊之獲磧石州叛逃土

官阿禪七站土官實納等斬之遂於東籠山南川度地
勢築城戍守遣使請事宜上曰洮州西番門戶今築城
戍守是扼其咽喉也遂命置洮州衛設官領兵守之英
進擊西番擒三副使癭噶子等班師 夏六月命都督馬
雲率兵征大寧

十三年春三月元國公托和齊知院阿珠屯和琳為邊
患命西平侯沐英總陝西兵討之由額齊納路渡黃河
歷賀蘭山涉流沙至其境去營五十里英下令分軍為

四一襲其背二掩其左右英率驍騎當其前夜銜枚以進合而圍之托和齊等駭惑不知所措皆俯首就擒獲其全部以歸

十四年春正月戊子元平章烏爾布哈等寇邊命大將軍徐達左右副將軍湯和傅友德率師討之夏四月達率諸將出塞友德為前鋒軍至北黃河敵駭遁友德選輕騎夜襲灰山克之擒其平章博囉布哈太史文通等沐英領兵出古北口獨當一面擣高州嵩州全寧諸部

過臚胸河獲知院李宣并其部衆而還

十五年五月上聞士卒海運多溺死者命羣臣議遼東屯田

十八年二月國子監祭酒宋訥獻守邊策大畧謂備邊在足兵足兵在屯田宜選諸將軍智謀勇畧者數人每將以東西五百里為制隨其高下立法分屯布列緣邊之地遠近相望首尾相應遇敵則戰寇去則耕此長久之法也上嘉納之

二十年春正月壬子朔命宋國公馮勝為大將軍潁國公傅友德為左副將軍永昌侯藍玉為右副將軍南雄侯趙庸定遠侯王弼為左叅將東川侯胡海武定侯郭英為右叅將率師北征納克楚上諭勝等曰納克楚詭詐未易得其虛實爾等且駐師通州遣人覘其出沒彼若在慶州宜以輕騎掩其不備既克慶州則以全師徑擣金山出納克楚不意必可擒矣既而復遣前所獲虜喇固北還以書諭納克楚等二月甲申馮勝等兵至通

州遣邏騎出松亭關聞敵騎有屯慶州者遣右副將軍
藍玉將輕兵出關襲之殺其平章果囉擒其子不蘭奚
獲人馬而還三月辛未馮勝等率師出松亭關築大寧
寬河會州富峪四城遂駐兵大寧夏六月庚午馮勝留
兵五萬守大寧率大軍趨金山辛未上勅諭勝等納克
楚去金山未遠以兵促之勢必來降且元主謂我得志
無意窮追必順逐水草往來黑山魚海之間掩其無備
彼衆可盡獲也丁酉勝等至遼河東獲納克楚屯卒三

百人馬四百餘匹遂進師駐金山之西時鼐喇固還至松花河納克楚見之大驚相勞問鼐喇固因諭以朝廷送還之意納克楚喜即遣其左丞劉特默齊叅政張德裕至軍門獻馬且因以覘我勝遣人送赴京師鼐喇固復備以撫卹之恩語其衆由是部落多有降意時臨江侯陳鏞所部與大將軍異道相失陷敵死之丁未勝等率師踰金山至女直若屯納克楚部將全國公衮通來降初納克楚分兵為三營一曰榆林深處二曰養鵞莊

一曰龍安一禿河輜重富厚畜牧蕃息元主數招之不
往至是大將軍逼之納克楚計窮剽固因勸之降納
哈出猶豫未決勝遣馬指揮往諭之納克楚乃遣使至
大將軍營陽為納款而更覘兵勢勝即遣藍玉往一禿
河受之使還報納克楚指天嘖嘖曰天不復與我有此
衆矣遂率數百騎詣藍玉降玉大喜出酒與之飲甚相
歡納克楚酌酒酬玉玉解衣以衣之謂曰請服此而後
飲納克楚不肯服玉亦持酒不飲爭讓久之納克楚取

酒澆地顧其下吐吐語將脫去時鄭國公常茂在座其
麾下趙指揮者解胡語以告茂茂直前搏之納克楚大
驚起就馬茂拔刀砍之傷臂不得去耿忠遂以衆擁之
見勝納克楚所部妻子將士凡十餘萬在松花河北聞
納哈出被傷遂驚潰餘衆欲來追勝遣前降將衮通往
諭之於是其衆悉降凡四萬餘羊馬駝驢輜重亘百餘
里納克楚有二姪不肯降勝遣人諭之乃折弓矢於地
亦來降勝以禮諭納克楚加慰諭令耿忠與同寢食遣

使奏捷奏常茂驚潰降衆遂班師悉以納克楚來降將卒妻子及其輜重俱南行仍以都督濮英將騎兵三千為殿初納克楚之降也餘衆驚潰者皆竄匿及聞大軍還以其降衆俱行甚恨之乃設伏於途候大軍過而邀之英等後至伏發猝為所乘衆寡不敵英馬蹶被執英絕食不言乘間剖腹而死秋七月丁酉納克楚所部營王實喇巴圖等來降八月壬子上聞馮勝等在軍中多不律遣使戒諭之癸酉馮勝械常茂至京茂勝之壻也

勝每於衆中卑折之茂不能堪出不遜語勝啣之及納克楚降而衆驚潰勝乃歸咎於茂奏之茂至陳所以降納克楚之故上曰如爾言勝亦不得無罪命收其總兵印召勝還令永昌侯藍玉總兵代之九月戊寅納克楚至京封為海西侯詔左副將軍傅友德徧集新附軍士駐兵大寧防寇 丁未以永昌侯藍玉為大將軍延平侯唐勝宗武定侯郭英為左右副將軍都督僉事耿忠孫恪為左右叅將率兵討殘元肅清沙漠冬十一月甲

午藍玉奏元丞相哈喇章烏爾布哈遁入和林乞進兵
勦滅許之

二十一年夏四月藍玉率師自大寧進至慶州聞元主
特古斯特穆爾在捕魚兒海間道兼程而進乙卯師至
百眼井去捕魚兒海四十餘里哨不見敵玉欲引兵還
王弼曰吾等提十萬衆深入沙漠未見敵而班師何以
復命玉然之弼復請戒諸軍皆穴地而爨毋令敵望見
烟火師遂進丙辰至捕魚兒海南飲馬偵知元主營在

海東北八十餘里玉以弼為前鋒直薄其營敵始謂我軍乏水草不能深入不設備又大風揚沙晝晦軍行皆不知元主方欲北行整軍馬皆北向忽大軍至其太尉蠻子倉卒拒戰擊敗之殺漫濟其衆遂降元主特古斯特穆爾與其太子天保努知院捏怯來丞相錫勒們數十騎遁去玉率精騎追之不及獲其次子地保努等六十四人及故太子必里圖妃并公主等五十九人其唐事院同知托音特穆爾將逃失馬竄草間擒之及追獲

吳王多爾濟代王達爾瑪平章巴朗等二千九百九十
四人軍士男女七萬七千三十七口得寶璽圖書金銀
印章馬駝牛羊車輛各籍數入奏聚其甲兵悉焚之遂
班師

二十二年夏五月癸巳置泰寧福餘朶顏三衛於烏梁
海以故元歸附阿爾薩里為泰寧衛指揮使達實特穆
爾為指揮同知海蘇實克為福餘衛指揮同知托勒呼扎
爾為朶顏衛指揮同知各領所部以安畜牧 秋七月

元伊蘇岱爾弒其主特古思特穆爾立琨特穆爾其部屬皆奔散元裔日微

二十三年春正月命傅友德為大將軍率列侯趙庸曹興王弼孫恪等赴北平訓練軍馬聽燕王節制出征沙漠勅王弼以山西聽晉王節制三月燕王率傅友德等出古北口哨得烏爾布哈等駐牧迤都遂進兵適大雪諸將欲止燕王曰天雨雪彼不虞我至宜乘雪速進癸巳遂抵迤都隔一磧敵不知也乃先遣指揮衮通徑詣

其營袞通與烏爾布哈有舊至則相抱持泣倉卒之頃
我師已壓其營衆大驚烏爾布哈等欲上馬走觀童諭
以燕王至毋恐烏爾布哈與俱詣軍門降燕王降辭色
待之賜之酒慰諭遣還烏爾布哈大喜過望於是悉收
其部落馬駝牛羊而還報捷京師上大喜曰肅清沙漠
者燕王也

二十四年春三月元遼王阿扎克實哩寇邊命潁國公傅
友德率列侯郭英等討之五月至和卓舍哩軍行友德

遽下令班師敵聞信之越二日忽趨師深入六月至黑
嶺鴉山等處洮兒河獲人口馬匹駐師金鞍子山七月
復征黑嶺寒山至磨鎌子哈喇津山追其渠札都深入黑
松林之地野人所居熊皮山追達勒達烏喇罕掩襲其衆大
獲而還 八月哈密寇邊命都督宋晟劉真率師討之九
月晟等破哈密擒其王子伯勒齊爾幽王桑結錫哩知院岳
山等殺其國公阿多爾濟俘衆一千三百人

二十五年夏四月涼國公藍玉率將士追逃寇祁者孫

遂進征西番罕東之地五月藍玉兵至罕東遣都督宋晟等徇阿真州土渠合咎等遁去尋奉詔移兵討建昌叛帥伊埒特穆爾秋七月癸未四川都指揮使瞿能率兵至雙狼寨攻破之擒偽千戶段太平等其衆大潰伊埒特穆爾遁去能督兵追捕進攻托羅等寨拔之伊埒特穆爾復遁能轉戰而前破水寨關及上區寨進至打冲河三里所與伊埒特穆爾遇大戰破走之俘其衆五百餘人溺死者千計獲牛馬無算官軍入德昌知府安

德渡打冲河道去能遂調都指揮同知陶凱分兵入普
濟州搜捕之獲駕橋於打冲河遣指揮李華引兵追托
羅寨餘孽進至水西斬伊埒特穆爾把事七人其截路
寨土渠長沙納的等皆中兵死能還攻天星卧漂諸寨
皆克之先後俘殺千八百餘人伊埒特穆爾復遁入柘
興州九月罕西西番叛入寇命都督宋晟總兵討平之
十一月甲午藍玉兵次柘興州遣百戶毛海以計誘致
伊埒特穆爾并其子胖其衆悉降送伊埒特穆爾至京

師伏誅玉奏四川之境地曠山險控扼西番宜增置屯
衛順慶府鎮禦巴梁大行諸縣其保寧千戶所北通連
雲棧宜改為衛漢州灌縣西連松茂碯黎當土番出入
之地眉州控制馬湖建昌嘉定接山都長九寨俱為要
道皆宜置軍衛下羣臣議行之 都督周興帥兵討元
逆臣伊蘇岱爾興追至察察爾山破之 十二月壬申
馮勝等奉命率列侯籍太原平陽民為兵伍置衛屯田
東勝立五衛大同立五衛大同迤東立五衛衛五千六百人

二十九年春三月寧王權言騎兵巡塞見有脫輻遺道上恐敵兵往來有盜邊之舉上曰狡寇多奸此必示弱誘我軍耳於是勅燕王選精卒抵大寧沿河南北覘北兵所在隨宜掩擊甲子燕王率諸軍北至察察爾山遇元兵與戰擒其將索琳特穆爾等數十人追至烏蘭和托城遇烏蘭鄂罕戰敗之

三十年春正月命耿炳文郭英巡西北備邊 五月己巳勅晉燕代遼寧谷六王勒兵備邊戒勿輕戰俟敵分

散驕怠邀截要路擊之

三十一年夏四月命燕王率諸王防邊勅曰北騎南行不寇大寧即襲開平可召西涼都指揮張文傑莊得開平都督宋真宋晟遼東武定侯郭英等皆以兵會遼王以護衛軍悉數北出山西北平亦然令郭英宋真宋晟翼於左莊得張文傑翼於右爾與代遼寧谷五王居其中彼此相護首尾相救兵法示饑而實飽外鈍而內精爾其察之五月戊午勅左軍都督楊文往北平并燕谷

寧三府精銳往開平從燕王防邊勅郭英總兵往遼東
隨遼王屯開平迤北險要防邊仍聽燕王節制乙亥命
燕王總帥諸王防邊勅曰朕觀成周之時天下治矣周
公告成王曰詰爾戎兵安不忘危之道也朕之諸子汝
獨才智秦晉已薨汝實為長攘外安內非汝而誰爾其
總率諸王相機度勢用防邊惠奠安黎民以答上天之
心以副吾付托之意其敬慎之毋怠

谷應泰曰塞下之險東起開鐵北歷喜峰西亘偏

頭五灰相距二千二百里而遙乃欲阻長城而堵之列亭障而蔽之設險守國蓋其難哉若夫高皇之定天下也與漢唐異漢唐之主所稱勝國之孽者悉中原之人耳乾符一御醜類盡殲寶錄攸歸餘裔革面然而漢圍白登唐苦突厥內地既輯邊患乘之強弩之末殊未可以易視也又况順帝北出漁陽旋輿大漠整復故都不失舊物元亡而實未始亡耳於時呼達一軍駐雲州王保保一軍駐

沈兒峪納克楚一軍駐金山實喇罕一軍駐西涼

引弓之士不下百萬衆也歸附之部落不下數千

里也資裝鎧仗尚賴而用也駝馬牛羊尚全而有

也假令蹕林祭燾大舉報仇田單一鼓而下齊申

胥七日而救楚豈得云情歸之氣沒世不復歟然

而太祖之攻之也分兵二道一出西安以搃定西

一出居庸以搃沙漠則雲中鴈門之勢斷矣及其


再舉也分兵三路徐達出中路李文忠出東路馮

勝出西路則盧龍榆關之援又絕矣而且築東勝之險是南仲之城朔方也設屯田之利是充國之守金城也宜乎左丞右帥東底開平鄧愈沐英西臨弱水雖貳師之入大宛張騫之通屬國其長駕遠馭未有若斯之極也厥後應昌之捷默德就俘武平之戰惠儲歸命於是犁幕南而無庭過陰山而慟哭元氏舊墟幾乎盡矣至於設伏馬陵揚水疏勒則桑格爾之跑地橐駝塞之冰城似有神助

功亦爛焉若夫燕雲割棄四百餘年石晉以來復
還版圖豈景純定限南北更合將衛霍樹績王者
無外耶



明史紀事本末卷十



總校官庶吉士臣張能照

校對官編修臣莫瞻菴

騰錄監生臣毛大羸